



Udruženje medijatora u Bosni i Hercegovini

Udruženje medijatora u Bosni i Hercegovini osnovano je u martu 2002. godine s ciljem stvaranja uslova za uvođenje medijacije kao alternativne metode za rješavanje sporova. Udruženje želi građanima i građankama pružiti mogućnost da brzo i efikasno rješavaju sporove i dođu do rješenja koja će zadovoljiti sve strane u sporu, a sudovima pomoći u rješavanju zaostalih predmeta, te dugoročno u smanjenju priliva novih predmeta.

Aktivnosti:

- pružanje usluga medijacije,
- pružanje usluga obuke za medijatore i certifikovanje medijatora,
- pružanje usluga posebnih programa obuke za sudije, advokate, korisnike medijacije i druge zainteresovane grupe,
- promocija medijacije i mirnog rješavanja sporova,
- praćenje dostignuća u razvoju medijacije u regiji i svijetu i povezivanje sa sličnim organizacijama.

Članstvo Udruženja medijatora čine sudije, advokati, prosvjetni radnici, psiholozi, novinari i ljudi drugih profesija koji su stekli sposobnosti i vještine za pomoć drugima u rješavanju sporova.



Udruženje medijatora u Bosni i Hercegovini

Kancelarija u Sarajevu
Adresa: Kaptol 5, 71000 Sarajevo
Telefon/faks: +387 33 215 825
e-mail: medijacija@epn.ba


Kancelarija u Banjoj Luci
Adresa: Voždovačka 3, 78000 Banja Luka
Telefon/faks: +387 51 316 682
e-mail: medijacija@blic.net
www.umbjh.co.ba




brza | nepristrasna | povjerljiva | jeftinija

MEDIJACIJA

od spora do dogovora





Sporovi su svakodnevna pojava i svima se događaju. Oni su znak da trenutnim stanjem ili odnosima nismo zadovoljni i da želimo promjenu. Medijacija nudi mogućnost da se do promjene dođe dogovorom na zadovoljstvo svih strana u sporu.

Šta je medijacija?

Medijacija je postupak u kojem treća neutralna osoba (medijator) pomaže stranama u nastojanju da postignu obostrano prihvatljivo rješenje spora.

Medijator olakšava razgovor i stvara pozitivnu atmosferu u kojoj se mišljenja i vrijednosti uvažavaju. Svaka strana može iznijeti svoje stavove, pojasniti kako trenutni spor utiče na nju, te kakve bi opcije zadovoljile njene interese. Medijator pažljivo sluša, usmjerava ih ka ključnim pitanjima, uočava zajednička stanovišta i interese i pomaže da na njima baziraju dogovor. Medijator ne donosi odluke o tome kako će spor biti riješen.

Postupak medijacije je dobrovoljan, povjerljiv i zasniva se na principima ravnopravnosti stranaka i neutralnosti medijatora.

Poređenje sudskog postupka i medijacije

Sudski postupak	Medijacija
Sudija odlučuje	Vi odlučujete
Jedna ili obje strane mogu biti nezadovoljne presudom	Rješenje je obostrano prihvatljivo
Zasnovan na primjeni prava	Zasnovana na zadovoljavanju interesa strana, uz poštovanje prava
Dugotrajan, pitanje mjeseci ili godina	Brza, pitanje dana ili sedmica
Javan	Povjerljiva
Međusobni odnosi se obično pogoršavaju	Odnosi postaju bolji ili ostaju isti
Žalba odlaže izvršenje	Sporazum o nagodbi je izvršan

Zašto izabrati medijaciju?

Povoljna je za strane u sporu, jer one same dolaze do rješenja, što povećava opredjeljenost za provođenje dogovora.

Djeluje. Dosadašnja iskustva u Bosni i Hercegovini pokazuju da se oko 60% predmeta koji dođu na medijaciju riješi dogovorom.

Pruža novu priliku. Medijacija može popraviti odnose između stranaka i otvoriti buduću saradnju zasnovanu na novim temeljima.

Brza i efikasna. Spor se može riješiti u periodu od nekoliko dana do nekoliko sedmica.

Jeftinija je u odnosu na druge postupke rješavanja sporova.

Sporazum potpisan na medijaciji ima snagu **izvršne isprave**. Ako ne dođe do dobrovoljnog izvršenja sporazuma, stranke izvršenje mogu tražiti od suda.

Ko i kada može pokrenuti postupak medijacije?

Postupak medijacije pokreću strane u sporu. Za održavanje medijacije potrebna je saglasnost svih strana. Medijaciji mogu pristupiti i ako nije pokrenut sudski postupak. Ako je sudski postupak u toku, stranke se mogu opredijeliti za medijaciju sve do zaključenja glavne rasprave.

Ko su medijatori?

Medijatori Udruženja medijatora u BiH imaju visoku stručnu spremu i završenu obuku o medijaciji, kroz koju su razvili vještine komunikacije i pregovaranja. To su stručnjaci različitih profesija, pravnici, ekonomisti, psiholozi, pedagozi, inženjeri, socijalni radnici... Medijatori koji su Vam na raspolaganju, upisani su u Registar medijatora, a podaci o njima dostupni su na listi medijatora u sudovima, kancelarijama Udruženja i na web stranici www.umbih.co.ba

Koji propisi regulišu medijaciju u BiH?

Medijacija je predviđena zakonima o parničnom postupku i zakonima o krivičnom postupku (u dijelu: odlučivanje o imovinsko pravnom zahtjevu). Parlamentarna skupština BiH usvojila je Zakon o postupku medijacije, koji reguliše postupak, a Zakonom o prenošenju poslova medijacije na udruženje medijatora, ove je poslove povjerila Udruženju medijatora u BiH. Udruženje je izradilo pravilnike i etički kodeks, koji detaljnije regulišu procedure upućivanja predmeta na medijaciju, izbor medijatora, troškove medijacije i osiguravaju kvalitet usluga.

Za koju vrstu sporova se koristi medijacija?

Medijacija se može koristiti u skoro svim vrstama sporova, koji se rješavaju postupcima regulisanim prethodno navedenim zakonima. Važno je da postoji saglasnost da se pristupi medijaciji i da stranke imaju pravo raspolaganja onim što je predmet spora. Medijaciju mogu olakšati prethodni dobri odnosi između strana u sporu, njihova upućenost na buduću saradnju, hitnost rješavanja pitanja koja su predmet spora, procjena ishoda i troškova sudskog postupka i slično. Ako stranke ne riješe spor medijacijom, na raspolaganju im uvijek ostaje sudski postupak.